

Ayacucho - Kallpancha Qellqapa - Comfort Scriptures

2 Corintios 1:2-4 Dios Taytanchikyá Señorninchik Jesucristopíwan kuyakuyintawan, hawkayayninta qosunkichik. 3 Señor Jesucristo Taytan Diosninchikyá qapaqchasqa kachun, payqa llakipayakuq Taytam hinaspá sonqo tiyachiq Diosmi. 4 Paymi tukuy sasachakuyninchikpi kallpanchawanchik, chaynapi ñoqanchikpas sasachakuypí kaqkunata Diospa kallpanchawasqanchikman hina kallpanchananchikpaq.

Proverbios 15:13 Kusisqa sonqoqa runapa uyantam kuyapata ruwan, onqosqa sonqom ichaqa runata llakichin.

1 Reyes 8:66 Fiesta tukupa paqarinnintin punchawtam llapa runakunata rey Salomón aviarurqa, chaymi llapa runakunaqa kusisqallaña sapakama wasinkuman ripukurqaku. Paykunaqa kusikurqaku serviqnin Davidpaqpas chaynataq Israelpa mirayninkunapaqpas Tayta Dios tukuy allinkuna ruwasqanrayku.

1 Crónicas 16:10 Chuya sutinmantayá alabakuychik, Tayta Diosta maskaqkuna sonqoykichikpi kusikuychik.

Proverbios 12:25 Llakikuyqa runapa sonqontam ñakarichin, kuyakuywan rimaymi ichaqa kusichin.

Proverbios 13:12 Imapas munasqan unamuptinqa runapa sonqonmi ñakarin, munasqan cumplikuruyninmi ichaqa kawsay qokuq sacha hinaraq.

Isaías 30:26 Hinaptinmi killapa achkiyininpas intipa achkiyin hinaraq kanqa, chaynataqmi intipas qanchis kuti mastaraq kancharinqa, imaynam qanchis punchawpi kanchayninta hina. Chaynam kanqa runankunapa isunta kikinpa isuchasqanta Tayta Dios wataspan hampisqan punchawpi.

Oseas 13:8 Wawanta chinkarachiq ukumari hinam hapiruspay qasqonkutapas llkiparusaq, león hinam paykunataqa mikurusaq, purun animal hinam paykunataqa tisaparusaq.

1 Samuel 1:8,10 Qosan Elcanañataqmi nirqa: Ana, ¿imanasqataq waqachkanki? ¿Imanasqataq mana mikunkichu? ¿Imanasqataq llakisqa sonqoyuq kachkanki? ¿Manachu ñoqa chunka wawakunamantapas aswan allin kani? nispa. 10 Hinasspam Anaqa llumpay llakisqa sonqontin, sinchi waqakuywan Diosta mañakurqa.

Salmos 25:16,17 Señorlláy, qawariykamuwaspa llakipayariykullaway, sapallaymi llakisqa kallachkani. 17 Sonqollaymi llakipa intusqan tarikun, kay llakimanta hurqoykullaway.

Salmos 34:18 Tayta Diosqa, llakisqa sonqoyuqkunapa hichpallanpim kachkan, payqa llakisqa sonqoyuqkunamat salvaykun.

Salmos 38:8 Cuerpollaypas ñutupasqam manaña kallpayuq kachkan, sonqollaypas hukmanyaspam ñakarichkan.

Salmos 55:4 Sonqollaymi nanay-nanay kachkan, wañuy manchakuymi inturullawan.

Salmos 61:2,3 Sonqollay wañunayaptinmi kay pachapa patanmanta qayakamullayki. Hatun qaqpata hawanman churaykullaway. 3 Qamllam waqaychaqniyqa kanki, enemigomanta pakakuna torrem kanki.

Salmos 62:8 Llaqtalláy, tukuy tiempo payllapi hapiakuy; paypa qayllanpi sonqoykiti kichariy, ¡Diosllam waqaychaqninchikqa!

Salmos 73:26 Aychallaymi sonqollaywan wañunayachkan, ichaqa Diosmi takyachiwachkan, payllam wiñaypaq herenciayqa.

Salmos 77:2,3 Llakikuyniy punchawmi Señorta maskallani, tutankunam makillayta hoqarispa mana tukuya mañakullani. Almallaypas manam hawkayayta tarinñachu. 3 Diosmanta yuyarispaymi waqarqani, yuyaymanaspaymi hukmanyarqani.

Salmos 86:11 Dios Taytalláy, ñannikita reqsichillaway cheqap kaqnikipi purinaypaq, allin sonqotaña qoykullaway sutikita hatunchanaypaq.

Salmos 109:22 Ñoqaqa ñakariypi sasachakupim kallachkani, sonqollaypas sinchi nanasqam kachkan.

Salmos 112:7,8 Mana allin noticiatapas manam manchakunqachu, Tayta Diosman hapiakusqanraykum, paypa sonqonqa hawkalla kachkan. 8 Sonqonpas qaqa hinam kachkan mana manchakuqmi kanqa, enemigonkunapa puchukasqantam asikuspa qawanqa.

Salmos 143:4 Pasaypaq llakisqam tarikullani, mana kallpayuqñam kallachkani.

Salmos 147:3 Payqa llakisqa sonqoyuqkunatam hampiykun, heridankutam hampiykun.

Proverbios 14:30 Llampa sonqoqa cuerpotam kawsachin, envidiakuymi ichaqa tullupi onqoy hina.

Eclesiastés 1:13 Hinaspm kay pachapi runakunapa tukuy ima ruwasqanta yachanaypaq tapukachakuspay sumaqta qatiparqani. Chay llasaq ruwaytam runakunaman Dios qoykurqa llamkanankupaq.

Eclesiastés 2:10 Tukuy ima munasqayta ruwaspaymi aychayta tukuy imawan kusichirqani, chaykuna ruwasqaywanmi sonqoy kusikurqa, chay kusikuymi llamkasqaypa pagon karqa.

Eclesiastés 2:22,23 ¿Imatataq runa hurqokun kay pachapi tutatapas punchawcharispa ñakariywan llamkasqanmanta? 23 Runapa kawsakuyninqa nanaypa ñakariypa huntasqanmi, tutapas yuyaymanarispanmi mana puñuya tarinchu. ¡Chaypas yanqallapaqmi!

Eclesiastés 11:10 Sonqoykimantayá piñakuyta wischuy, mana allin ruwaykunamantayá ayqekuy, warma kaywan joven kayqa tukuruqllam.

Isaías 30:29 Qamkunam ichaqa, pascua fiestata ruwasqaykichik tutapi hina takinkichik, songomantam qamkunaqa kusikunkichik, qenata tocaspa Tayta Diospa orqonman richkaq hinam kusikunkichik, Israelpa amparakunan Diosman richkaq hinam kusikunkichik.

Isaías 57:15 Wiña-wiñaypaq kawsakuq Diosmi, hatu-hatun Chuya Diosmi kaynata nin: Ñoqaqa alto-altopim, chuyay-chuyay sitiopim yachani, wanakuspa uchuychakuqkunawanmi yachani, hinaspaymi paykunata kallpanchani.

Isaías 65:14 Serviqniykunaqa sonqonkupi kusisqam takinqaku, qamkunam ichaqa llaki sonqoyuq qaparkachankichik, ñakarispam llakipi tarikuspa waqankichik.

Isaías 66:13,14 Imaynam wawanta maman consuelan chaynatam qamkunata consuelasqaykichik, Jerusalén llaqtapim consuelota tarinkichik. 14 Chayta qawaspam sonqoykichik kusikunqa, llanllariq qora hinam tulluykichikpas musoqyanqa. Tayta Diosmi serviqninkunaman atiyninta reqsichinqa, enemigonkunamanmi ichaqa piñakuyninta rikuchinqa.

Jeremías 15:16 Tukuy Atiyniyuq Dios Taytalláy rimapayawasqaykiman hinam palabraykita mikurqani. Chay palabraykikunaryakum sonqoypi anchallataña kusikurqani, ñoqaña qampam kallani.

Jeremías 24:7 Tayta Dios kasqayta reqsiwanankupaqmi yachayta qosaq. Paykuna llaqtay kanqa, ñoqañataqmi Diosninku kasaq, chaynaqa kanqa tukuy sonqonkuwan ñoqaman kutirikamusqankuraykum.

Juan 14:1 Amayá songoykichikqa hukmanyachunchu. Diospiyá creeychik, creeychiktaqyá ñoqapipas.

Juan 14:27 Hawkayaytam saqekichik, hawkayayniytam qoykichik, kay hawkayay qosqayqa manam runakunapa qosqan hinachu. Amayá hukmanyaychikchu nitaq manchakuychikpaschu.

Juan 16:6 Aswanraqmi qamkunaqa kay nisqaywan sinchi llakisqa kachkankichik.

Juan 16:22 Chaynam qamkunapas kunan llakisqa kachkankichik, ñoqa kutimuptiymi ichaqa kusisqa kankichik, chay kusikuytaqa manam pipas qechusunkichikchu.

Hechos 2:46 Sapa punchawmi templopi huk sonqolla huñunakuqku, wasin-wasin huñunakuspam hatun kusikuywan mikuya mikuqku, tantatapas partinakuspankum mikuqku.

Romanos 9:2 Llumpa-llumpay llakisqam kachkani, sonqoypas tukuy tiempom nanasqa kachkan,

2 Corintios 2:4 Punta kaq cartata qellqamuspayqa, sonqoypi hukmanyasqa ancha llakisqa hinaspa weqe ñawintinmi qamkunaman qellqamurqaykichik, ichaqa manam llakisqa kanaykichikpaqchu, aswanqa llumpay kuyasqayta yachanaykichikpaqmi.

Efesios 5:19 Huknikichikmanta huknikichikkamayá kallpanchanakuychik: Salmokunawan, himnokunawan, sonqomanta lloqsimuq takikunawanyá, Señorninchikman tukuy sonqowan takispa yupaychaychik.